

**Naalackersuisut sulianut anguniakkanullu annertuunik anguniagaqartillutik tamatigut angunissaannut piffissamik missiliuteqartuarnissaannut peqqusisoqartarnissaq pissusissamisoornersoq apeqquteqaat aallaavigalugu oqallisissiasatut siunnersuut.**

(Pele Broberg, Inatsisartunut ilaasorta, Naleraq)

**Akissuteqaat**

(Naalagaaffinngornissamut Nunanullu allanut Naalackersuisoq)

Pele Broberg apeqquteqaat aallaavigalugu oqallisissiasatut siunnersuuteqarneranut Naalackersuisunit qutsavigaarput. Naalackersuisut sulianut anguniakkanullu annertuunik anguniagaqartillutik tamatigut angunissaannut piffissamik missiliuteqarnissaannut peqqusisoqartassanersoq siunnersuuteqartup siunnersuuteqarnermini akitikkusuppa. Tamanna aqutsilluarnerussasoq siunnersuuteqartoq isumaqarpoq. Naalackersuisut tamanna tunngaviatigut isumaqatigaat, Naalackersuisulli aamma oqaatigerusuppaat, suliniutit anguniakkallu pissutsit aallaavigalugit iliuseqarfigineqartariaqartartut.

Timmisartoqarfinnik sanaartorluni suliniuteqarnerni piffissalersuinerit assigiinngitsut pequtigalugit kinguaattoorfiusarimasut siunnersuuteqartup assersuuteqarfigai. Piffissalersuisoqarsinnaasarpoq, taamaakkaluartorli piffissalersuinerit assigiinngitsunik peqquteqarluni atugaqarluniluunniit allangorsinnaasarput. Annertuumimmi sanaartorluni suliniuteqarneq pisariusinnaasarpoq. Piffissalersuinerit naapertuukkunnaartarnerannut assigiinngitsorpassuit pequtaasinnaapput. Timmisartoqarfiliorluni suliniuteqarnerit avataanit sunniutit pequtigalugit kinguaattoorfiusimapput, soorlu nunarsuaq tamakkerlugu Coronamik tuniluuttoqarnerani. Taamaammallu aamma piffissaliussanik eqquutsitsinngissinnaanerit tunngavilersorluagaappata akuersarneqarsinnaasarput. Tamatumani Naalackersuisut isumaqataasinnaapput.

Kalaallit Nunaata naalagaaffittut oqartussaaffigineqalernissaata qagugu isumaqatigiissusiarineqarnissaannut Naalackersuisunit suli takussutissaqartitsinnginnerat siunnersuuteqartup immikkut assersuusiaraa.

Kalaallit Nunaat namminerisamik naalagaaffinngorpat nunarput naalagaaffittut oqartussaassuseqalerumaarpoq, tamannalu Namminersorneq pillugu inatsimmi § 21-mi allassimavoq. Naalagaaffittut oqartussaassuseqalernikkut naalagaaffik nunap killeqarfiisa iluanni tamakkiisumik pisinnaatitaaffeqalerlunilu oqartussaassuseqalertarpoq, taamalu aamma naalagaaffittut kiffaanngissuseqarluni oqartussaassuseqalertarluni.

Siullertut, Kalaallit Nunaata namminiilivinnissaanut Naalackersuisut suliniuteqarnerput qularineqanngilluinnassaaq. Anguniagaqarneq tamanna imaannaanngitsuvoq oqaluttuarisaanermilu pingaaruteqarluni. Allaalluunniimmi nunatsinni anguniagaqartarsimanitsinni pingaarnerpaatut oqaatigineqarsinnaagunarpoq. Angutserlugulu anguniakkat immikkoortukkaat suliniutillu aqqusaartussaavagut. Taamaattorliuna namminiilivinnissaq sanaartorluni suliniuteqarnermit pisariunerujussuusoq. Taamaattumillu politikikkut aamma tamat oqartussaqaataanerit ilanngullugu pisortatigoortunik aqqusaagaqaqaartussaavugut, minnerpaamillu innuttaasunik taasitsineq aammalu Inatsisartuni aalajangiinerit arlaqaaluttut aqqusaqaqaartussaallutigit.

Tamat oqartussaaqataanerat nunami maani amerlasuujusugut pingaartitaraarput. Kalaallit Nunaata naalagaaffittut oqartussaaffigineqalernissaanut Namminersorneq pillugu inatsimmi § 21 Naalakkersuisunit innersuussutigaarput, tassanimi nassuiarneqarpoq, Kalaallit Nunaata namminiilivinnissaa qanoq anguneqassanersoq. Tamatumani pisortatigoortumik suli aalajangiisoqanngilaq, taamaammallu namminiilivinnissap aallartinnissaa ukiulerlugu Naalakkersuisut pisortatigoortumik oqaatigisinnaanngilaat.

Inatsisartut siorna upernaakkut ataatsimiinnermini Namminersorneq pillugu inatsimmi § 21-p qulaajarneqarnissaa nassuiarneqarnissaalu pillugit, namminiilivinnissaq naalagaaffinngornissarlu pillugit innuttaasut isumasiuilluni taasitinneqarnissaat kiisalu Inatsit Tunngaviususaaq pillugu Isumalioqatigiissit suliaasa naliliivigineqarnissaa Naalakkersuisunut peqqussutigaa.

Tamatumunnga atatillugu Namminersorneq Nunanullu allanut Naalakkersuisutut Inatsisartut Inatsiseqarnermut Ataatsimiititaliaanik arlaleriarlunga ataatsimeeqateqartarsimavunga, kingullertigullu § 21-Isumalioqatigiisitaliap pilersinneqarnissaanut pisinnaatitsissut Inatsisartut Inatsisinut Ataatsimiititaliaanik oktobarip aqqarnani akuersissutigineqarpoq, taamalu Namminersorneq pillugu inatsimmi § 21-p qulaajaavigineqarnissaa pillugu suliaq aallartissinnaanngorlugu.

Taamatuttaaq suliassaqarfiit 30-t missaanniittut akisussaaffigineqalernissaat pilersarusiorneqartussaapput, tamatumani suliassaqarfinni ataasiakkaani aningaasartuutissat 1 million koruunit missaaniit untritilikkaanik arlaqartunik millioner koruunit angullugit annertussuseqarput. Aningaasallu taakku aningaasaqarnermut inatsisitsinni nassaarinianeqartussaapput. Taamatuttaaq suliassagut nammineq isumagisinnaalissagutsigit inuusuttut innuttaasullu amerlanerit ilinniagaqalernissaannut suli iliuuseqartariaqarput.

Kalaallit namminiilivinnissamik kissaateqarnerat naatsorsuutigisinnaagipput isumaqarpunga. Namminiilivinnissaq ukiulerniarsinnaagaluarparput, taamaattorli piviusut, pissutsit akuusussallu avataaneersut ilisimasaqarfiginngisarpaasuagut sunniuteqarfigisinnaanngisagullu aamma eqqarsaatigineqartariaqarput.

§ 21-Isumalioqatigiissitamit innersuussutit takoqqaarallartigit. Taamanikkornissaanut namminiilivinnissaq pillugu tamakkiisumik naliliisinnaalissaagut. Tamatumalu kingorna namminiilivikkiartornissamut taamalu naalagaaffittut oqartussaalernissamut ukiuliinissamut tunngavissaqarnerulersimassaagut.

Pingaarnertulli namminiilivikkiartornissaq ataatsimoorfigissavarput, taamalu suliassatsinnik amerlanerusunik isumaginnissinnaalernissatsinnut innuttaaqatit – inuusuttut utoqqaanerusulluunniit – amerlanerusut ilinnialernissaannut aqutissiuutissavagut.

Taama oqaaseqarlunga inersuarmi oqallittoqarluarnissaanut Naalakkersuisunit kissaassivugut.